



# Ayuuno Na Ebunit Alokidiama

Watson Goodman ngesi egiri

Aka pas—meere agielat

## **AYUUNO NA EBUNIT ALOKIDIAMA**

**“Ayuuno na ebunit alokidiama” erai ngakitatamet na eseunitae alowaitin alugelagelae a Ngagiran a Akuj ana erai Abibilia. Anupit ayong atamar Abibilia bon ngesi isileereuni Ngagiran a Akuj.**

**Ebunit Akiroit a Akuj “alokidiama” nakaneni ngesi bon epedori ayuun ngitai lu iitanito ngakiro na eteniyete loger lo enyamitor itwaan akoro ka akure. Naelimoria itwaan ngasecesea keng tolung, tocam Ekapolon Yesu Kirisito kiboikin lotau keng, nabo tonup a etau keng kadaang atamar erai Ekapolon Yesu Kirisito Ekayuunan, itodiun Ekapolon Yesu elope anikeng sodi kitaanyu ekanupan ala—kara nakeng a ilope ka ekisil. Aanyuni kolong ayong nu ekaru a 1937, nakaneni eringa ayong nyetiaka arukit. Kemaimai ayong iyong atamar tocam ngesi toliwor Ekayuunan ka Ekapolon kon tokona, keringa sek iyong nyecamuna ngesi.**

**—Watson Goodman (1920-2002)**

**Ngirumi 5:8**

Nakaneni kitodik Akuj ngoni dir eger lo kiminar ngesi ngoni ani kolong atoania Kirisito kotere ngoni kiringa kirai ngikasecak.

**Yoana 13:1**

Ani eringa Esukukuu enyaritae Adeparet nyenanga, toyen Yesu atamar adol esaa lo erotokinio ngesi anakwapin kanu tolot nika Apa keng. Amina ngesi ngitunga lu arai ngikeng anakwapin kanu, tominak kesi tanang losal.

**Akitodikinet 1:5**

Ani a Yesu Kirisito lo erai Ekaa-nyunan lo emunoi, lo erai ngesi erai lo ekingaren iteyarunio, nabo

lo erai ngesi epolokinit ngikapo-  
lok daang a akwap kana. Nikeng  
alo kimina ngoni, sodi kitorimak  
ngoni ngasecesia yok kilota a  
ngakot keng.

**Yoana 3:16**

Kona kolong aminar Akuj  
ngitunga a ngakwapin tolemik  
ngesi Lokookeng lo edounitoe erai  
epeu bon, sodi ani itwaan ni enupi  
ngakiro keng, nyebukor, nakaneni  
toriam akiyar na nyedaun.

**Yeremia 31:3**

Atakanuni Ekapolon anikang  
anialonon ebala, kamina ayong  
iyong nakajik; nakaneni arubakini  
ayong kamina iyong.

Emam itwaan epega atamar epolok noi ngakiro namunonoe kinupit ngoni. Atakanuni Akuj erai itwaan kitodiu Etaui a Akuj atamar erai lo eteneno, toanyu-ngasi ngimalaikae, kitatamae ngibukui lu nyerai Ngiyaudi ngakiro keng, tonupa ngitunga ngakiro keng anakwapin kadaang, sodi tolot kidiama nasegaanut a Akuj.

—I Timoteo 3:16

Kolong eringa ngakwapin nyesubakina, ayei Akiroit, arukito Akiroit ka Akuj, arai Akiroit Akuj.... Toliwor Akiroit ngina itwaan eruko ka ngoni... arai ngesi lo ajakaanit noi eruoro ngakiro na iteni. —Yoana 1:1 ka 14

Tolimok Yesu ngesi tama, Pilipo, ikwaa ngirwa lu kirukitor ayong ka esi daang, eringa iyong nyeyana ayong a? Itwaan ca daang ni kengolik ayong, engolik tani Apa kang. Nyo bo tokona ibalar iyong kitodikinae Apa? Nyinupit iyong atamar ayei ayong nika Apa, nabo eyei Apa nikang a? —Yoana 14:9, 10a

Asubasi nu daang sodi kiyookinotor nguna kolong alimuni Akuj Ekapolon alokataman keng tama, Epoti apese na nyepero ka ekile a ace kidou ikoku nisapat, enyarao ngesi Emanuel, ngesi atamar, Akuj eyei kiding yok.

—Matayo 1:22, 23

I Yoana 4:15

Itwaan ca daang ni elimuni atamar erai Yesu Lokookeng a Akuj, iboi Akuj anikeng nabo iboi ngesi ani a Akuj.

Ngikolosai 2:9

Kainyo eyei eboyor daang lo a Akuj nakwaan a Yesu.

Isaya 9:6

Kainyo idounio ikoku aniyok, kiinakin ngoni ikoku: eliwor ngesi ekapolon. Enyarao ekiro keng Eketutukon Lokooson, Akuj Naapolon noi, Apa lo emam esal, Ekarikon a Ekisil.

Luka 1:35

Totacak emalaikat tama, Elo-muni Etau a Akuj nikon, nabo agogong a Akuj a na eyei kidiama min nikon kimuk iyong loger a etorube; kotere nguna ngini idounio eliwor ibekot, enyarao ngesi Lokookeng a Akuj.

Matayo 17:5

Ani eringa ngesi iruoro, sodi to-burucia kesi edou loti akwaan kia: dio kiirarae etoil iruorikini alodou ebala, Lokookang lominat ngesi lo, ngolo ketalakarit ayong noi, topupokisi esi ngesi.

## 4 Kilimokinit Yesu ngoni atamar ngesi ngae

Yoana 8:23

Totacak Yesu tama, Iponito esi alokwap kane, abunit ayong alokidiana; irakasi esi ngika ngakwapin kanu; meere ayong eka ngakwapin kanu.

Yoana 11:25

Totacak Yesu ngesi tama, Ayong ngesi arai ayarun ka akiyar. Itwaan ni enupi ngakiro kang, eyari tani ketoanit.

Yoana 9:5

Ani eringa ayei nakwapin arai ayong akica a ngakwapin.

Yoana 6:35

Tolimok Yesu kesi tama, Ayong arai akimuj na akiyar. Ni ebuni

nikang, nyenyami akoro. Ani ni enupi ngakiro kang, nyenyami akure.

Yoana 13:13

Kinyarito esi ayong Eketataman ka Ekapolon iyookinito dir nguna kainyo arai.

Yoana 8:58

Totacak Yesu kesi tama, Kalimokinit ngakiro na iteni dir atamar, kocolong eringa Aburaam nyidouno, ayei ayong.

Yoana 10:7

Tolim Yesu nabo tama, Kalimokinit ngakiro na iteni dir atamar, Ayong arai ekidor a ngame-sekin.

# Ngakitodikinet nakaililok ngace asubi Yesu 5

Luka 5:5, 6

Totacak Simon tama, Eketataman, kisub sua etic loatinon akwaar daang etia ni etia, nakaneni emam ibore kirum jik. Tokona boca ani kibala iyong neni, acakakini ayong ngiputei nanam. Ani naacakakineta kesi ngiputei nanam, kirumut ngikolia lukaalak noi tocil epute kec.

Matayo 14:19-21

Sodi kidesik ngesi asepic a ngitunga atamar kiboikinos lonya, dio tolem ngamugati nakan ka ngikolia luarei sodi tokienya kidiama nadis, tobuak Akuj alakara, tonyil ngamugati ani erumor nak ngirukitos keng, sodi

nakis ngirukitos keng asepic a ngitunga. Kimuja kesi daang kimwoko: kidepunae ngakanyilinyil na edongete kilelebun ngategerin ngatomon ka ngaarei. Arai ngitunga lu anyamete ngikiliok ngabunge ngakan; paimarunitae ngaberu ka ngide.

Matayo 20:30 ka 34

Nakaneni eboyete ngimuduk ngiarei alorot, nairareta kesi Yesu itoruni diyete neni, kiremasi ebalasi, Kisienoi kare sua Ekapolon, lo irai lokookeng a Daudi....Kisienoto Yesu kesi tatap ngakonyen kec, sodi taanyungasi ngakonyen kec akwap atipei sodi kiwapakis kesi Yesu.

## 6 Yesu Kirisito erai Ekasubunan ka Ekapolon

Ngieburaniae 1:2

. . . Kisuruor ngoni Akuj ngirwa lu a esal lu ani a Lokookeng, lo aseu ngesi toliwor ekeruman a ibore kadaang, lo kolong tani erai ngesi asubia ngesi ngakwapin.

Ngirumi 14:9

Kainyo erai nu ngesi atoania Kirisito dio toyaru sodi toliworor Ekapolon alu atoaka ka lu eyarete.

Ngikolosai 1:16

Kainyo ngesi kolong asubia Akuj ibore daang, ni eyei nadis ka ni eyei nakwapin, ngiboro lu etakanete ka lu nyetakanete, kerai ngapolosio kori ngationisio kori ngapolon a adis kori lu eweikinito

akwap: asubi kolong Akuj ibore daang anikeng, kotere ngesi.

Yoana 1:3

Ngesi asubi ibore daang; nakaneni emam ibore tani ipei asubio emam ngesi.

Ngiticisio 2:36

Tokona boca, ejoikinit ngitunga daang a Isirael eyenete dir atamar Yesu lo iramakinete esi lomusalaba ngolo ngesi etiliwo Akuj Ekapolon ka Ekayuunan Loseuna.

I Ngikorinitoi 1:9

Kipedori ngoni amuno Akuj dir, na erai ngesi kinyaraunere esi tarata ngipei ka Lokookeng Yesu Kirisito, Ekapolon yok.



# Yesu Kirisito erai Ekeriran kadaang 7

**Ngirumi 2:16**

**Ikokinete ngakiro neni nairiraa  
Akuj ani a Yesu Kirisito ngakiro  
daang na imunonito ngitunga.**

**II Timoteo 4:1**

**Alongaren Akuj ka Yesu Ki-  
risito lo irirae lu eyarete ka  
lukatoak na ebunio ngesi erai  
Ekapolon.**

**Ngirumi 14:10**

**Nakaneni nyo iriraa iyong  
lokaatokon? Ani iyong lo in-  
yamene ibore daang, nyo imenya-  
ritor iyong lokaatokon? Kainyo  
kiwei ngoni daang alongaren eki-  
colong a Kirisito kirirae.**

**Matayo 25:32**

**Nakaneni ecununosi ngitunga a  
ngibukui kadaang ngaren keng:  
sodi totiak ngesi kesi ngaarei,  
loger lo etiakia ekeyokon ngame-  
sekin ka ngaanei.**

**Yoana 5:22**

**Kainyo emam itwaan irirae  
Akuj, nakaneni ainaki Lokookeng  
eriras daang.**

**Ngiticisio 10:42**

**Kicikakini ngesi sua atamar  
etatama ngitunga nabo atolimosi  
atamar ngesi lo aseu Akuj aliwor  
ekeriran ka ngulu eyarete ka  
ngulu atoaka.**

## Kirisito bon kilacuni

Yoana 10:9

Ayong arai ekidor, itwaan ca daang ni elomuni kitoru nikang, eyuunio, elomuni nabo topudo, dio kitanae.

Yoana 14:6

Totacak Yesu ngesi tama, Ayong ngesi arai erot, ngakiro kang erai na iteni, nabo ayong arai akiyar. Nyelosi itwaan nika Apa mati kitoru nikang.

Ngieburaniae 5:9

Naetiliworere ngesi lo ikiuna, toliwor akisiekinet a ayuuno ananyedaun ani eya daang lu iwapete ngesi.

Ngiticisio 4:12

Emam ayuuno anitwaan a ice. Kainyo emam ekiro ece anak-wapin lo ainakin ngitunga toyu-unotor.

Yoana 8:24

Ngakiro nguna ngesi kalimokinitor esi atamar itoakete esi alosec kus. Kainyo ani pakinupa esi dir atamar ayong ngesi ngolo, itoakete esi alosec kus.

Ngieburaniae 7:25

Kongina boca, epedori ngesi jik ayuun noi daang lu epote nia Akuj itorunito nikeng, kainyo eyari ngesi jiik ilipene Akuj kotere esi.

**I Ngikorinitoi 1:30**

Nakaneni kitiliwo Akuj esi ngipei ka Yesu Kirisito, nabo etiliwo Akuj Kirisito aosou yok, lu etenii eboyor, lubekon ta lukilacun.

**Tito 2:14**

Alemun kolong ngesi kotere ngoni, esaki atamar kitoyuu ngoni anaronis kadaang, sodi kitiliwo ngoni lu kikiuna lu kirai ngikeng, lu kiitanit akisub naajokak.

**Akitodikinet 5:9**

Toewokis kesi eowos lokitetet tamasi, Ejoikina iyong ilemari akitab sodi tobwang ngigoliet. Kainyo kiario kolong iyong, nakaneni kotere akitu nakon ngina,

ilacak iyong ngitunga a ngitela kadaang, a ngabukui kadaang ka ngakwapin daang ta ngibukui daang, aliwor ngika Akuj.

**Luka 19:10**

Kainyo abuni Lokookeng a Itwaan akisak ka ayuun ngulu eakara.

**Ngikolosai 1:12-14**

Ibuakinito Apa alakara, na kolong kimarakini ngoni nakiro na a ngitunga keng, anapolou ana a akica, na kiyuu ngoni anationis a aribu, sodi kiwaak ngesi ngoni napolou na a Lokookeng alominat: lo erai ngakot keng ngesi kilacunere ngoni, nabo kitorimakinere tani ngasecesia yok.

## Ngirumi 5:9

Tokona boca, kona kimarunere ngoni atamar kitenii kotere ngakot keng, kiyuun ngoni ananyunyura a Akuj kotere ngesi.

## Ngiepesoi 1:7

Lo erai ngesi kilacunere ngoni kotere ngakot keng, kirimakin ngoni ngasecsea yok, itemem ka alalau a ajakaanut a Akuj.

## I Petero 1:18, 19

Kainyo iyenete esi atamar pakolong kilacuno esi a ngiboro alu epedorete akinyasun ikote asuat nanyang kori naakwaan egielio a ngaropiae anakaalak, kori ngakiro napasiek na ianyunito esi ani kata apaa kus. Nakaneni kigielenio a

akipeyos anateno a ngakot a Kirisito, loger a Imesek ani eta-leuno emam ni esecec.

## I Yoana 1:7

Nakaneni ani kimin ngoni nakica loger lo eyakar ngesi nakica, kipupo ngoni make. Ani ngakot a Yesu Kirisito Lokookeng ngesi ikisarete akisec daang aniyok.

## Ngieburaniae 9:14

Esubasi ngakiro natenoyek noi a ngakot a Kirisito, kotere agogong a Etau a Akuj alokajik, tolemun ngesi ani a Akuj ikiuna. Itosegete ngakot keng ngitai yok alotalio alupasiek sodi atosubeta ngoni etic a Akuj ana eyari.

Kona tokona kimarunere ngoni lu a iteni lu kiriyan alongaren Akuj kotere anupit yok, kisilil Ekapolon yok Yesu Kirisito ngoni, ka Akuj. —Ngirumi 5:1

Kona kirakar ngoni ngipei ka Yesu Kirisito, nyekacitae kilengerit ngoni ngawat yok kori kemam. Nyikitiakak ngoni tani wadyo; anupit bon itemokino na itodiuna alocami. —Ngigalatiae 5:6

Kainyo kiyuu Akuj esi a ajakaanut keng kingaru kotere anupit kus. Nakaneni meere kotere ngiticisio kus a ngikulepek, pearai ainakinet a Akuj alope. Mam ibore ecamit esi inisatar, kainyo nyebunit ayuuno nikus kotere

agogong kus a ngikulepek.

Ngiepesoi 2:8, 9

Kainyo itwaan daang ni erai ikoku a Akuj ipiyori ngakiro a ngakwapin. Nakaneni kipiiori ngoni ngakiro a ngakwapin kotere anupit yok. —I Yoana 5:4

Nakaneni igiritae nu tonupeta esi atamar Yesu erai Ekayuunan Loseuna Lokookeng a Akuj, sodi ani kinupa esi ngakiro keng, taanyut akiyar anikeng. —Yoana 20:31

Sodi kingita kesi ngesi tamasi, Kikokini tokona sua kisubi ngiticisio a Akuj ai? Totacak Yesu tama, Etic a Akuj lo: tonupa ngakiro a lokolong ameuni Akuj.

—Yoana 6:28, 29

Ngieosio 103:11

Eger lo eloniya adis alokwap, ngesi epolotor akisienut keng ani eya ngulu ekerito ngesi.

Ngieosio 103:17

Nakaneni akisienut keng erai aka jik ani eya ngulu ekerito ngesi, nabo iteni keng min lode a ngide kec.

Ngieosio 108:4

Kainyo epol akisienut kon id-wangit adis nakaneni enangit iteni koni lodowon.

Mika 7:18

Ngae Akuj anikon na erimana-kini naaronok, nabo erimanakini ngasecesia ka ngulu idongito alo-tunga keng? Meere anyunyura

keng nakajik kainyo emina ngesi akisienut.

Asutonokin 3:22, 23

Erai kotere akisienut a Eka-polon ngesi eringakar ngoni nyemunyara. Kainyo nyipiyono-rio akisienut keng. Erai akitetet ataparac daang. Epolot anupit kon.

Tito 3:5

Abu ngesi kitoyuu ngoni, meere kotere ngakiro naajokak nguna kisubi ngoni ngikulepek. Erai aki-sienut keng ngesi kiyuunia ngesi ngoni alorot alo akitesega a na kiinakinia ngoni Etaui a Akuj aki-douno nakitetet ka eboyor lo-kitetet.

Matayo 11:28

Potu nikang, daang ngulu inuasi ka egos loapolon sodi kesiyanga.

Isaya 55:1

Ee, itwaan daang ni enyamit akure, bu nakipi, ani ngini emam ngaropiyae, bu, togiel, tonyam. Bua togiel emuna lo epuritoe ka ngakile emam ngaropiyae nagelet.

Akitodikinet 22:17

Ebalasi Etau a Akuj ka ateran, Bua! Itwaan daang ni iirari nguna ecamit elimuni tama, Bua! Bu itwaan ca daang ni enyamit akure.

Ani itwaan ca daang ni esaki, tamat ngakipi na akiyar loger lo ecamitor ngesi.

Yoana 7:37

Akwaar naapolon na arai na esal a Esukukuu, tonyou Yesu kirema tama, Itwaan daang ni enyamit akure, bu nikang, tamat.

Isaya 1:18

Ebala Ekapolon, Potu tokona, sodi eana aapei. Tani kerengak ngasecesea kus puu, ekwangiarosi kia kidwanga ngidowon. Tani kerengak loger a aoru naarengan puu, ekwangiarosi kia kidwang ngajul a amesek anaakwaan.

## 14 Meere ngitunga daang erai ngide a Akuj

I Yoana 3:10

Kotere nguna totiakunotor ngide a Akuj alokiding lu a ekipe, Itwaan daang ni penyesubi na iteni na eriyen, kori penyemina lokaatokeng, meere ngesi ikoku a Akuj.

Ngirumi 8:14, 15

Daang lu erikit Etau a Akuj erai ngide a Akuj. Etau lo kiinakini esi Akuj, nyikisikokini esi ngirikon, tokuriaketa, pearai kitarau Etau ngolo esi ngide a Akuj, nabo kotere agogong keng epedori itwaan akikaloun ani a Akuj ebala, Apa! Apa kang!

Ngilipi 2:15

Sodi toliworotor esi lunyisecito, ngide a Akuj lu ikiuna, lu iboyete

anakwapin ana eya ngitunga lu a nginyas, lukasecak. Ejoikinit esi imaunete anikus loger a ngikanyer alu inwakunito kidiana.

II Ngikorinitoi 6:17, 18

Nakaneni ani ngoni lu kiliwori ngipei ka Ekapolon, kiliwori ngoni ka ngesi akwaan apei kotere ngakiro na etau. Tocoikisi emalanu kainyo akisec nace daang na esubi itwaan meere akenyasunan akwaan keng, nakaneni itwaan ni esubi emalanu, inyasunit ngesi akwaan keng a ilope.

Yoana 1:12

Nakaneni daang lu ecamunete ngesi, ngulu enupete ngakiro keng, ainakin agogong na eliworotor ngide a Akuj.



Iruoro Akuj ngakiro aemunae  
alo adwaran alo epurio

15

Wae! Etieko ngitunga enyounete nataparac kisuakakis lopurot loadwaran, tamata jiik towar kiraka epurot. —Isaya 5:11

Ngiticisio lu esubi akwaan ileere, etakanete anakiro a na ikote elomit, emalanu, ngakiro na nginyas ka na ngileec ta akilipit ngitorubei atamar Akuj, ta akapel, amoitanut, eburas, etereku, angoit, ngiturum, abolo, atiakatiaka a ngitunga kotere ayan, amonis, amera a epurot ka adakanu ta ngakiro nace naaronok na ikote nu. Aberakin alimokin kona kolong kalimokinia ekingaren atamar, ngulu esubete ngakiro

nguna, nyeanyunete apolou a Akuj jik. —Ngigalatiae 5:19-21

Eboikinos niajokon loger a ngitunga a lu eyakasi nakica, emam ngakiro naaronok na ikote akisirakanar epurot, adakanu ka etereku a ngawat kori elomit ta ejie kori etereku. Nakaneni tolemasi ngiboro lujiet, lu kiinak Ekapolon Yesu Kirisito, tojongo to aneikina ngakiro naaronok a etereku kus. —Ngirumi 13:13-14

Kuria nyingolik epurot eger lo erengia, eger lo ejokia alokopo, eger lo esibitor totuk. Ani ekisidi kikonyi loger a emun ka akipom. —Ngakamatak 23:31-32

## 16 Nyitemokino akiruoro ngakiro na iteni bon

Matayo 22:37, 38

Totacak Yesu ngesi tama, Tominak Ekapolon Akuj kon a etau kon kadaang ka akiyar kon daang ta ngitamen kon daang, Etal lo eteneno noi ngesi lo.

Mariko 10:17-22

... Eketataman loajokon, eko-kini ayong abili aanyun akiyar na nyedaun ai? Kingit Yesu ngesi tama, Nyo kinyaritor iyong ayong loajokon? Emam itwaan ejok pearai Akuj bon. Iyeni iyong ngitalio lu ebaasi, Nyiar, nyilom, nyikoko, nyiruor ngakiro na erai alioko, nyingala, toker apa kon ka

ito kon. Tolim ekile ngolo tama, Eketataman, napei kolong a ekiditeu kang, ericunit ayong ngitalio lu daang. Tokienyik Yesu ngesi a ecami tama, Eroko ibore ipei bon, kape togiela ibore ni itingit iyong daang tokoranak ngikebootok ngaropiyae, sodi min ebarit kon kidiana nadis. Ani erumor bu kiwapak ayong. Naeiraria ekile ngolo nguna, torotok esiliyorit kainyo abarit ngesi noi.

Ngakamatak 16:25

Eyei erot lo esibit anitwaan ejok, nakaneni eya ngirotin lu a akitu losal keng.

**Ngiepesoi 5:6**

**Kuria itwaan nyikingal a ngakiro anabaang. Nguna ngesi ebalar Akuj ebuni eriras nitwaan daang ni nyenupit ngesi.**

**Yakobo 1:22**

**Ejoikinit isubete na elimunito ngakiro a Akuj, meere akipup bon, toliwor ingalasi make.**

**I Ngikorinitoi 6:9, 10**

**Iyenete esi dir atamar nyeanyunete ngikaronok apolou a Akuj. Warasi nyingalasi make, kainyo ngitunga lu iwapito etereku a ngawat, kori lu ilipito ngakujuo nesubuna kori ngikalomak kori ngikiliok lu iunete ngikiliok luce ka ngaberu na iyuunete ngaberu**

**nace topero, kori ngikokolak kori ngikadekak kori lu irakarit epurot kori ngikaswamak ta ngikademak, emam itwaan alokiding ngulu ni irumi apolou a Akuj.**

**I Yoana 3:7, 8a**

**Ngide kang! Warasi itwaan nyikibata esi, Itwaan ca daang ni esubi ngakiro na eteniyete erai itwaan ni etenii eboyor, loger lo eteniyo Kirisito. Itwaan ca daang ni erubakinit eseceene erai ika ekipe kainyo aseki kolong ekipe napei anakisiekinet.**

**Ngigalatiae 6:3**

**Ani kitam itwaan atamar arai ngesi ibore, tarai ngesi pas kongin, ingala ngesi bon.**

**Ngirumi 5:12**

Itwaan ipei ngesi ayauni akisec nakwapin, sodi kirukut akisec keng ka akitu. Kotere nguna akeikin akitu lotunga daang ani asecia itwaan daang.

**Yakobo 1:15**

Sodi etereku ngolo ani kiraka itwaan, irokuni akisec. Ani ke-masikin akisec nitwaan, irokuni akitu.

**Esekiel 18:20**

Etoani etau ngolo eseci. Nyetingete ikoku naaronok ka apa keng kori nyetingete apa naaronok a lokookeng. Eanyuni itwaan niajokon ngakiro naajokak

nabo eliworosi naaronok ngaka itwaan aniaronon.

**Ngirumi 8:6**

Kainyo akiwapit ngakiro akwaan ngesi akitu, nakaneni akiwapit ngakiro a etau ngesi akiyar ka ekisil.

**Luka 15:32**

Nakaneni ejoikinit ngoni kipeyoe atalakaros, kainyo ekoni lokaatokon itwaan niatoanit, nakaneni ayaru ngesi tokona. Aca-kara, nakaneni atakanu tokona.

**Ngakamatak 11:19**

Kona idireta na eteniyete nakiyar, ngini iwapit naaronok iwapit akitu keng a ilope.

Yoana 11:43, 44

Alimunet nguna kirema to-nyara tama, Losaro! Topud nika-lapatan! Topud ekatoan ngolo nikalapatan, einikinitae ngakan keng ka ngakejen ngiworui lualiel, nabo abutarit eworu ereet keng. Tolimok Yesu kesi tama, Talacasi kimiekis tolot.

Yoana 10:17, 18

Kamina ayong apa kang ani alemunor ayong akijal akiyar kang sodi atoriamunia nabo. Emam itwaan kademari ayong akiyar kang, ajali ayong ilope loger loasakitor. Apedori ayong akijal, apedori ariamun nabo.

Nguna ngesi kedestik ayong apa kang atamar atosub.

Luka 7:14, 15a

Tolot Yesu taapia nibore ni elepilepitere totap, sodi towaa ngitunga luadakito. Tolim Yesu tama, Edia, kalimokinit iyong atamar, tonyou! Abu itwaan nika-toan ngini kiboikin toloma aki-ruoro.

Akitodikinet 1:18

Ayong ngesi lo ayari! Atoanit ayong, nakaneni ayari tokona ayong nakajik! Apolokinit ayong akitu ka ni eya ngikatoak.

Akitamunet a ngitalio 5:7-21

Nyepean iyong ngakujuo ngace pearai ayong. Nyisubak ngakujuo naicieo kori ekitetemes a ibore ka-daang alokidiana adis, kori ni eyei kwap nakwapin kori ni eyei nakipi anakwapin. Nyilip ngiboro lu kori nyisubak etic.

Nyinyara pas ekiro a Ekapolon Akuj kon, kainyo nyetamari Ekapolon nyesecit itwaan ni enyarit ekiro keng pas.

Kiricak akwaar na ngikan-kaarei kitoseg, loger lokilimokinia Ekapolon Akuj kon. Kitiya etic ngirwa ngikan-kapei, tosub ngakiro kon daang, nakaneni akwaar na a ngikan-kaarei erai aka

Ekapolon Akuj kon . . . Toker apa kon ka ito kon, loger lo elimunitor Ekapolon Akuj kon, sodi kiatakitor ngirwa kon.

Nyiar.

Kori nyilom.

Kori nyikoko.

Kori nyilimok ekidunyet kon alioko.

Kori nyikiterekuia aberu a ekidunyet kon.

Kori nyikiterekuia akai a ekidunyet kon.

Kori amana keng, kori ekedalan keng, kori akasuban etic keng, kori ibore ca daang ni etingit ekidunyet kon.

Yeremia 23:24

Ebala Ekapolon, Eyei ni idaa ni edukia itwaan nyaanyu ayong a? Nyeleleba ayong nadis ka nakwapin a?

Ayubu 34:21, 22

Kainyo iteete ngakonyen keng ngirotin a itwaan nabo itee ni itorit itwaan daang. Emam aribu kori etorube a akitu ni epedoreta ngikasubak naaronok akiduk.

Ngieosio 139:8, 12

Ani kalot kidiama nadis, iyei iyong inaa. Ani kasubak niperot

ananam a akim, iyei iyong inaa. . . . Iteni, nyeduki aribu anikon, nakaneni ecai akwaar loger a apaaran. Ikwaan aribu ka akica anikon.

Ngakitadapet 15:3

Iteete ngakonyen a Ekapolon wadaang, iteete naaronok ka naajokak.

Luka 8:17

Kainyo emam ibore ni idaitae ni nyetakanuni, nabo ibore daang ni erapap, nyileereuni sodi kimau akica.

## II Petero 3:7

Nakaneni adis ka akwap na tokona eyakasi erai akiroit napei edungunit Akuj ngina eyakatar sodi kinyasunere a akim.

## Ngieosio 9:17

Ecakakinio nanam a akim ngulu esubete naaronok ka ngitunga a ngakwapin daang lu emuriak Akuj.

## Matayo 13:41, 42

Emeuni Lokookeng a Itwaan ngimalaikae keng tocunakis daang lu itosecenate luce ka ngikasecak daang, kipudunoe

Anapolou a Akuj. Sodi tocunakis kesi nakim nakariran, kigoro kaina tokirica ngikel.

## Matayo 25:46

Eyaario ngulu loriras lo emam esal. Nakaneni eloose luajokak nakiyar na nyesaluni.

## Matayo 18:8

Ani kitosec iyong akan kon kori akeju kon, totubo tocaka. Ejojinit ilomari nakiyar ingwalit akan kori akeju idwangit acakakino nakim na nyedunge eyakasi ngakejen daang ka ngakan daang.



**Ngiticisio 17:31**

Kainyo aseu ngesi akwaar na iriraa ngitunga daang a ngakwapin alorot alo eriyan. Erai itwaan ni aseu ngesi irirare ngitunga a ngakwapin.

**II Petero 2:9**

Nakaneni eyeni Akuj ayuun ngitunga lu eminasi ngesi anakinigito kec, nabo eyeni aisikin luaronok ananyunyura tanang akwaar na a eriras.

**I Yoana 4:17**

Itemokin amina aniyok sodi atotinyekerotor ngoni akwaar na eriras. Nakaneni kititinyer ngoni

kainyo ikwaan akiyar yok anakwapin kanu kana a Kirisito.

**Ngieburaniae 9:27**

Etoani itwaan daang atoanet apei ani erumor kirira Akuj.

**II Ngikorinitoi 5:10**

Kainyo kiwei ngoni daang alongaren ekicolong a Kirisito loa eriras, kirira ngesi ngoni. Eanyuni itwaan daang na itemem ka nakolong asubi ngesi a akwaan keng ana a ngakwapin kanu, kerai naaronok kori naajokak.

**Ngirumi 14:12**

Isisakini ipei yok daang Akuj ngakiro na asubi ngesi.

... Itopegi Akuj lu iwogasi nakaneni itaanyunit lu itiditeuna ajakaanut. —I Petero 5:5b

Iyenete esi ajakaanut a Ekapolon yok Yesu Kirisito. Tani kebarit ngesi loger lo ebaritor, abu ngesi tarau ekebotonit kotere esi, sodi tabareta esi ani aliworor ngesi ekebotonit.

—II Ngikorinitoi 8:9

Nakaneni nyikwaan luarei nguulu. Kainyo ainakinet a Akuj na a pas, nyikwaan ka akisec a Adam. Erai iteni dir atamar atoakete ngitunga lukaalak kotere akisec a itwaan anipei kangini. Nakaneni eteneno ajakaanut a Akuj noi. Eteneno tani aina-

akinet keng na a pas na eanyunete ngitunga lukaalak kotere ajakaanut a itwaan a ipei, Yesu Kirisito. —Ngirumi 5:15

Kanguna, esubasi daang kotere akisienut a Akuj meere na esaki itwaan, kori na esubi, nakaneni erai nakisienut a Akuj bon.

—Ngirumi 9:16

Atobuakisi Akuj alakara noi kotere ainakinet keng na emam ibore itemere.

—II Ngikorinitoi 9:15

Tolimonosi ngimeanara ngakiro a ayarun a Ekapolon Yesu a agong anaationon noi sodi totopia Akuj kesi daang lojojokon noi. —Ngiticisio 4:33

**Ngiticisio 17:30**

Nyimarit Akuj ngikaru lu peayeneta ngesi ngitunga. Nakaneni adungoki tokona ngitunga daang a wadaang atamar tolunga ngasecesea kec.

**Luka 13:3**

Meere kongina! Kalimokinit ayong esi atamar ani pekilunga ngasecesia kus, itoakete tani esi daang loger kec.

**Ngiticisio 3:19**

Tolunga robo ngasecesia kus, toreunos nia Akuj, sodi kitorimakinia ngesi esi ngasecesia kus. Ani kikokis esi neni, epote ngirwa lu ilakarotor esi noi ani a Ekapolon Yesu.

**Ngiticisio 2:38**

Tolimok Petero kesi tama, Ejoikinit ipei kus daang elungi ngasecesia sodi kibatisae a ekiro a Yesu alo erai Ekayuunan Loseuna sodi kitorimakin ngasecesia kus, ianyunete esi ainakinet a Akuj, ngesi Etau a Akuj.

**II Ngikorinitoi 7:10**

Kainyo akiyalolong na itojoki Akuj, erikit akibelo a etau na eyauni ayuuno. Nakaneni emam ibore eriabae iitonorio kaneni. Nakaneni erikit akiyalolong na erai aka eboyor a ngitunga akitu.

**Matayo 3:2**

Ebala, Tolunga ngasecesia kus kainyo aapuu apolou a Akuj.

Matayo 6:14

Ani kirimanakis esi luce ngasecesia na kiscecanakineti esi, kirimakini esi dang Apa kus lo eyei nadis.

Esekiel 18:21

Ani kelung ekasecan ngasecesia keng daang, sodi kiwap ngitalio kang daang, tosub nguna itemokino ka na iteni, iteni eyari, nabo nyetoani jik.

Isaya 55:7

Kimiek ekasecan toisik erot keng, toisik niaronon ngitamien keng. Kimiek ngesi tobongu nia a Ekapolon kainyo isieni ngesi. Kimiek tobongu nia Akuj kainyo erimakini.

Akitodikinet 3:20

Topupok mono iyong! Awei ayong alokidor edongidongi. Ani kiira itwaan etoil kang, tangaa ekidor alomuni ayong kai keng emuja ka ngesi, sodi emuja ngesi ka ayong.

Ngiticisio 5:31

Ngolo ngesi kolong aseuni Akuj kisibak anakan keng anaaloteten, toliwor Ekarikon ka Ekayuunan, sodi taanyuneta ngitunga a Isirael kona elungete ngasecesia kec sodi torimakinae.

Mariko 2:5

Naayenia Yesu atamar enupito kesi lokejokon, tolimok ekile loangwalan tama, Lokooku, arimakin ngasecesia kon.

Kiwakisi ngitamen kus nakiro na eyakasi kidiama nadis, meere nakiro na a ngakwapin kanu.

—Ngikolosae 3:2

Kuriasi nyikiminut ngakiro na aribu napasiek na esubete ngitunga lu eya naribu. Yautu nguna daang nakica. —Ngiepesoi 5:11

Kilotaros, kitosegas, tacakasi naaronok daang nyemino ngaren ngakonyen kang. Toisikisi akisub naaronok. —Isaya 1:16

Kainyo esileereu Akuj ajakaanut keng alorot alo eteyaria ngitunga daang. Kitatami ngoni ajakaanut ngina aisikin ekiboye loaronon lo kolong peayenere Akuj ka etereku a ngakwapin

kanu, sodi eboikinos kicoikinit ngawat yok anakiro anaaronok ataraakas lu a iteni. Eboikinos kisubi ngakiro na ejoikinito Akuj anakwapin kanu. —Tito 2:11, 12

Warasi nyiminakis ngakiro a ibore kadaang ani erai ika ngakwapin. Ani kiminakis esi ngakiro a ngakwapin, nyiminasi esi Akuj Apa. Ibore daang ni erai ika ngakwapin, ibore niaronon ni imuit akwaan, ibore ni iteete ngitunga ka ni esakete, ka ibore daang a ngakwapin kanu ni iwogatar ngitunga emam tani ipei ni ebunit ani a Akuj Apa, ebunit daang anakwapin.

—I Yoana 2:15, 16

## Esekiel 36:26

Kainakini nabo etau lokitetet nabo ewak akiyar nakitetet tooma kus. Alemari etau lokaagonon loger a amoru atacaka, sodi kainak esi etau lokaanokan loger a akiring.

## I Yoana 2:29

Iyenete esi atamar erai Kirisito lo etenii eboyor lokojokon. Ejoikinit robo esi iyenete atamar itwaan daang ni esubi ngakiro na eteniyete, erai ikoku a Akuj.

## II Ngikorinitoi 5:17

Naimorikinotor itwaan ka Kirisito, aliwor ngesi isubuna nikitetet, adaun nangorok apot nakitetet.

## I Yoana 5:18

Kiyeni atamar emam ikoku a Akuj ni erubakinit eseceene, kainyo ecoikinit Lokookeng a Akuj ngesi nabo nyewani ekipe ngesi.

## Yoana 3:3

Totacak Yesu ngesi tama, Kalimokinit ngakiro na iteni dir atamar, anipekidoun itwaan na a ngaarei, nyeanyuni Apolou a Akuj.

## I Petero 1:23

Kainyo kidoun esi akitetet irakasi ngide lu nyetoakete, meere lu etoakete, kotere akiroit na eyari na nyedaun a Akuj.

**Ngiepesoi 2:1, 6**

Kolong ekingaren itoakito esi alotai kus kotere ngasecesia kus; ... kona kiraakar ngoni ngipei ka Kirisito Yesu, kiteyar ngesi ngoni apena ka ngesi Napoulou a Akuj anadis.

**Ngikolosae 3:1**

Kiteyarun esi aapei ka Kirisito ipotu nakiyar. Nakaneni ecamit isakete ngakiro na eya kidiama nadis ni eyei Kirisito lo iboi anakan anaaloteten a Akuj.

**I Petero 2:24**

Kirisito elope ngesi ewoki ngasecesia yok anakwaan keng alokidiana emusalaba sodi atotoaka ngoni anakiro a nge-

secesia, nabo atoyara ana eteni-yete. Kitangalekin esi kotere ngajemei keng.

**Ngigalatiae 5:24**

Ngulu erai ngika Kirisito Yesu, ekokis kolong kesi ngitunga lu atoaka alotooma ngawat kec ka etereku kec.

**Ngirumi 6:2, 11**

Kikoni ngoni ngitunga lu kitoaka alosec, ani kikoni ngoni nabo kirubakinit alosec ai? ... Aloger alopei kangolo, ejoikinit tokona esi dang iyenunete atamar ikokis esi lu atoaka eboyor kus nyisecete. Ikokis esi lu iyarete ka Akuj alopit a Yesu Kirisito.

Akiyar na emem nyedaun ngesi kiyeneta ngitunga iyong Akuj na iteni na irai apei bon, nabo toyenuneta Yesu Kirisito lo kolong kameuni ayong. —Yoana 17:3

Kona ipedoria akilem ageor alokito a amana, iteni tani na isubi iyong a akwaan iriamuni iyong akitu ekisidi keng. Nakaneni na isubi iyong kotere Etao a Akuj, iriamuni akiyar na emam nyedaun. —Ngigalitiae 6:8

Loger lo kolong ekearia Musa emun a asuat kiwaak nakitoe anariet, loger lopei ngolo ejoikinit Lokookeng a Itwaan ikeario, sodi itwaan daang ni enupi ngesi, taa nyu akiyar na emam nyedaun. Ka-

limokinit esi ngakiro nu atamar, itwaan ni eira ngakiro kang nabo tonup ngolo kolong kameuni ayong, eyei akiyar na nyedaun. Nyirirao ngesi nakaneni etor nakitua aloma nakiyar.

—Yoana 3:14, 15; 5:24

Ni enupit Lokookeng eyei ngesi akiyar na emam nyedaun. Ni nyenupit Lokookeng nyeanyuni akiyar, nakaneni emini anyunyura a Akuj nikeng jik. —Yoana 3:36

Kainyo akitu ngesi kitacakinio kotere akisec, nakaneni akiyar na emam nyedaun ngesi erai ainakinet a Akuj na a pas ani a Yesu Kirisito, Ekapolon yok.

—Ngirumi 6:23



**Isaya 32:17**

Erikito na eteniyete ekisil, nabo erikito na eteniyete akigenokin ka amunokin nakajik.

**Ngigalatiae 4:6**

Kona irakatar esi ngide keng; abu Akuj tomeu Etau a Lokoo-keng tooma ngitai kus. Etau ngolo irema ebalala, Apa, Apa kang.

**Yoana 14:21**

Itwaan ca daang ni acamu ngitalio kang nabo kiwapite, ngesi kamina ayong. Eminakini Apa kang itwaan ca daang ni kamina ayong, aminakini ayong dang ngesi nabo etatakanun anikeng.

**Ngirumi 8:16**

Imorikin Etau a Akuj ka lu yok kitodiu atamar kirai ngono ngide a Akuj.

**I Yoana 3:18, 19**

Ngide kang, nyejoikinit amina yok erai ngakiro na iruoroe pas, ejoikinit erai amina na iteni na itodiun aloticisio. Eger lo, robo, ngesi kiyenunia ngoni atamar erai ngakiro yok na iteni, eger lo ngesi kititinyekeror ngoni alongaren Akuj.

**I Yoana 4:13**

Kiyeni ngoni dir atamar kiboi aapei ka Akuj nabo iboi Akuj aapei ka ngoni ani kitaanyunia ngesi ngoni Etau keng.

## Akiboi a Kirisito alotau erai alakara

Yoana 17:13

Abunit tokona ayong nikon, alimunit ayong ngakiro nu kanege anakwapin, sodi talakarotor kesi noi.

Ngirumi 14:17

Kainyo meere Apolou a Akuj aka ekimuje ka emase, nakaneni erai aka eetenone dir ani Akuj na ekisil ka alakara na kitaanyuni Etau a Akuj.

Ngigalatiae 2:20

Nyeringa nabo ayong ayari, nakaneni erai Kirisito eyari anikang. Akiyar na tokona eyei nikang eboi ayong anupit Lokoo-

keng a Akuj lo kamina ayong, sodi tojal akiyar keng kotere ayong.

Isaya 12:3

Nakaneni eoki ngesi ngakipi anakar a akiteyaro a alakara.

Yoana 15:11

Kalimok ayong esi nu sodi minio alakara kang nikus, nabo talakaros esi noi.

Ngieosio 16:11

Kitodikini iyong ayong erot lo akiyar: eyei alakara noi ni iyei iyong, nabo eya naajokak jik nakan kon naaloteten.

**I Samuel 12:15**

Nakaneni anipekiwap esi etoil a Ekapolon, sodi tongero etal a Ekapolon, kiremokin esi Ekapolon loger lokolong aremokinokor ta apaakus.

**Ngirumi 6:16**

Iyenete esi dir atamar na ijalatar esi toliworos ngirikon ngulu iwapito ngakiro a itwaan a nice, irakasi esi dir ngirikon a Ekapolon alo iwapito ngakiro keng. Kiraakasi ngirikon a akisec ana eyauni akitu, kori ngirikon a na eteniyete.

**II Ngitesalonike 1:7-9**

Sodi kitalacak ngesi esi lu iriamunito ngican ka sua dang. Esu-

bakini ngesi nguna akwaar na etakanunia Ekapolon Yesu anadis ka ngimalaikae keng lukaagon-gok. Emini akim naariran. Iirae ngesi ngulu nyeyenete Akuj ka ngulu nyiwapito ngakiro naajokak a Ekapolon yok Yesu Kiri-sito. Iritario kesi, toriamut ngican aloriras, kinyasunos kesi nakajik, nyingolikis kesi Apolou a Ekapolon ka agogong keng.

**Akitamunet a ngitalio 11:26-28a**

Kingolikisi, ewaak ngaren kus apiaro ka ngilam. Kapiari kiwapa esi ngitalio a Ekapolon Akuj kus, lukadungokini esi akwaar na. Nakaneni kelami pekiwapa esi ngitalio a Ekapolon Akuj kus.

Ngipilipi 2:11

Tolimut ileerete tamasi, Yesu Kirisito ngesi erai Ekapolon, Apolou min nia Akuj Apa.

Matayo 10:32, 33

Itwaan daang ni elimori alotunga atamar ngesi itwaan kang, alimori ayong dang ngesi ani ka Apa kang a lo eyei nadis. Nakaneni itwaan daang ni epegi alotunga atamar meere ngesi itwaan kang, apegi ayong dang ani ka Apa kang a lo eyei nadis atamar nyayeni ngesi.

Ngirumi 10:9, 10

Ani kilim iyong atamar Yesu ngesi Ekapolon sodi tonup atamar eteyaruni kolong Akuj ngesi,

kiyuunio iyong. Kainyo erai anupit yok ngesi kimarunia Akuj ngoni atamar, eteneno dir eboyor yok anikeng, nakaneni erai na kilimuni ngoni ngesi kiyuunere.

Kainyo itwaan daang ni ca engerit Lokookeng a Akuj, engerit tani Akuj Apa. Itwaan ca daang ni ecamunit Lokookeng a Akuj, ecamunit tani Akuj Apa.

—I Yoana 2:23

Itwaan ni itimi alimor ayong ka ngakiro kang, tani Lokookeng a Itwaan dang itimi alimor ngesi naebunio Lokookeng a Itwaan Anapolou keng ka Apolou ka Apa keng ka ngimalaikae luasegak aapei.

—Luka 9:26

**II Ngitesalonike 2:9**

Loaronon ngolo, ebuni ngesi etingit agogong a ekipe, tosub ngakitodikinet nakaililok nakitalarete na a alioko.

**I Petero 5:8**

Tosubakinos lokejokon, sodi tokiyenya iricuna! Kainyo irimit emoit kus ekipe akwap loger a engatuny esaki itwaan ni enyami.

**Matayo 4:1, 10, 11**

Sodi toreea Etau a Akuj Yesu nariet kiningio ngesi ekipe kaina. . . . Sodi totacak Yesu tama, Kape iyong ekipe. Igititae kona, kilip Akuj Ekapolon kon bon, sodi

tosub etic keng bon! Sodi tosik ekipe Yesu, potu ngimalaikae kingarakis ngesi.

**Ngiticisio 26:18**

Ingaari iyong ngakonyen kec toreunos kesi anaribu pot nakica, nabo toreunos anagogong a ekipe pena nia Akuj. Sodi ani kenupa kesi ngakiro kang, erimakinio ngasecesia kec dio toliworos ngipei ka ngitunga a Akuj lu-seuna.

**Ngiepesoi 6:11**

Tolemutu ngiboro daang lu kigaet lu kiinak esi Akuj, towaatar tongero ngakiro naaronok daang na kilokitor esi ekipe.

## II Ngitesalonike 2:8

Sodi totakanu Loaronon ngolo kiangak Ekapolon Yesu ngesi taar, kinyasu kotere apolou keng naebunio.

## Yakobo 4:7, 8a

Tokona boca, kiwapa ngakiro a Akuj. Kitopega ekiye, nakaneni ematar ngesi ani iyakasi esi. Taaputu nia Akuj dio taapu ngesi dang nikus.

## Ngieburaniae 2:14

Kona eraakatar lu enyarit ngesi ngide ngitunga lu eya ngawat ka ngakot, kikwaanikin Yesu elope ka kesi, kiruko ka kesi erai it-waan. Asubi ngesi nguna kongina

sodi kinyasunia ekiye lo erai ngesi epolokinit akitu.

## Ngirumi 8:35, 37

Nyo epedori akitiak ngoni ka amina a Kirisito? Ngican kitia-kete a? Kori ngakiro nakationok, kori aboliaro, kori eron a akoro, kori eboot, kori awana, kori akitu? Nakaneni kipiuni ngoni ngakiro daang kotere ecami lo kiminar ngesi ngoni.

## I Yoana 3:8

Itwaan ca daang ni erubakinit eseceene erai ika ekiye, kainyo aseki kolong ekiye napei anaki-siekinet. Akiroit kolong naga atakanunia Lokookeng a Akuj, akinyasun ngiticisio a ekiye.

**I Yoana 4:20**

Ani kebala itwaan amina Akuj, nakaneni toremokino lokaatokeng, erai ngesi ekaliokon. Kainyo nyepedori ngesi aminakin Akuj na nyeanyungara erai pekemina lokaatokeng lo anyunga.

**I Ngikorinitoi 13:1**

Tani kayeni ayong akiruor ngakiro a ngitunga ka na ngimalaikae, ani kemam ayong ecami, ekoni ayong ibore ni eruo pas kongin loger a ekadongot.

**Ngigalatiae 5:22, 23a**

Nakaneni kona ekonio ekitoe ageor, tani na etakanunete Alo-tau a Akuj kesi nu: ecami, alakara, ekisil, anaikinit, apatanu,

arakau nia iteni, akitiditeuna, arakau ni iricakinit eboyor.

Ani kiminakinosi esi make, eyenete ngitunga daang atamar esi ngirukitos kang. —Yoana 13:35

Kingit na a ngaarei tama, Simon lokookeng a Yoana, kimina iyong ayong a? Totacak tama, Ee, Ekapolon, iyeni iyong atamar kamina ayong iyong. Tolimok Yesu ngesi tama, Tocoik ngame-sekin kang. —Yoana 21:16

Kiyeni ngoni atamar kiisik akitu, sodi apotu nakiyar. Kiyeni ngoni nguna kainyo kimina ngikaitotoi yok. Itwaan ca daang ni nyemina, eringa eyei nago-gongu a akitu. —I Yoana 3:14

Kirai sua ngikaanyunak a ngakiro kadaang ana asubi ngesi anakwap a Ngiyaudi ka Yerusalem. Taarai ngesi a aramakin lomusalaba. Nanakeni kiteyaru Akuj ngesi akwaar na a ngauni kitodiu ngesi, meere alotunga kadaang, nakaneni kitodiu anikosi a lu kolong kiseuni Akuj atoliwor ngikaanyunak. Ngulu ngesi lu emujete ka akimat ka ngesi ekisidi a ayarun keng. —Ngiticisio 10:39-41

Adaunet a ngirwa a ngikan kauni, ayakasi nabo ngirukitos keng tooma arukito ka Tomas dang. Bu Yesu egolol ekidor, towo alokiding kec tolimok tama, Ekisil min nikus. Ani erumor

tolimok Yesu Tomas tama, Kiwaak ekimoin kon ne tatap ngakan kang, sodi kitorwa tani akan kon tatap esiep kang. Nyiliwor itwaan nikangayan, toliwor nikanupan. Tolim Tomas tama, Ekapolon kang! Akuj kang!

—Yoana 20:26-28

Epotorio ngesi kotere ngasecesia yok taarae. Apon kiteyarunae ngesi toyar sodi atocamunotor ngoni ka Akuj.

—Ngirumi 4:25

Naayarunia Yesu akwaar na Jumapili nataparac, kitodiun ngesi ani a Mariam Magidalene anakolong epudori ngesi ngipian ngikan kaarei.

—Mariko 16:9



**Matayo 16:21**

Tolomak Yesu esaa ngolo alimokin ngirukitos keng ngakiro na eleerete ebala, Ejoikinit ayong alosi Yerusalem katoboliatar ngikasukou a Atuk ka ngimurok lua-polok a Akai a Akuj ta ngiketata-mak a Etal. Kaario ayong ani akwaar na a ngauni ayaruni.

Kalimokinit ngakiro na iteni dir atamar, monan ngicerwa, tani tokona adol ngirwa ngulu, iirarete Lokookeng a Akuj, nakaneni ngulu iirarete eyarete. . . . Warasi ngakiro nu nyikitalasi, enangi monan ngicerwa lu iirarete ngikaram daang etoil keng, tolomut analielin kec, ngulu esubete naa-

jokak iteyarunio toyara; ngulu esubete naaronok iteyarunio kirirae. —Yoana 5:25, 28, 29

Iyenete esi atamar ngoni lukibatisae kirau ngipei ka Kirisito Yesu, nabo kikok ngoni ngitunga lu kitoaka loger lo atoania ngesi. Ngoni nakibatisare, ekokisi ngitunga lukitoaka, kimur, kiyaru ka Kirisito aapei kotere agogong naapolon a Akuj, Apa yok ana kolong eteyaruni Kirisito, sodi etaan-nyuneta ngoni eboyor lokitetet. Kainyo ani kirau ngoni ngipei ka ngesi atotoaka atoyarutu, loger lo kolong atoania ngesi, toyaru, kiyaruni ka ngesi aapei apena nakiyar. —Ngirumi 6:3-5

Luka 1:74, 75

Kiyuuni ngesi ngoni alomoe yok sodi elipeta ngoni ngesi pekibulit, sodi atoliworotor ngoni lubekon lu ejok dir eboyor yok anikeng, ngirwa daang lu kiyaria ngoni.

II Ngikorinitoi 7:1

Erai ngakicikakinet nu daang ngayok ngipalon luminan. Toko-na boca, ejoikinit ngoni kikiun ani eya daang na inyasunete akwaan ka etau. Atoliworos lubekon ani kiboyo kikerit Akuj.

II Timoteo 2:21

Ani kitoseg itwaan totiakun ka-  
nguna, eanyun arimatoi, eliwor

ibore niilatara, niejoikinit Ekapolon, esubere etic daang loajokon a Ekapolon.

I Petero 1:15

Ejoikinit esi irakasi lubekon anakiro kadaang ana isubete esi loger lo esegia Akuj na kinyarae esi.

I Petero 1:2

Kiseunio esi ani acamitor Akuj Apa nabo kitiliwo Etau a Akuj ngitunga lubekon, sodi kiwapa Yesu Kirisito nabo kitiliwo lu ikiuna a ngakot keng. Agasi atamar taanyut esi ajakaanut ka ekisil loajokon noi.

**Isaya 35:8**

Nabo amini Erot Loapolon neni ka erot loci, sodi enyarao Erot Loasegis. Lu nyeseagak nyitorete lorot ngolo, nakaneni eliwor eka ngikalotok, tani kebangaka nyengopikini kesi erot ngolo.

**Ngieburaniae 13:12**

Ibore ngini ngesi atoania Yesu dang anikalapatan a ere, sodi kikiunia ngitunga anakisec a ngakot keng a ilope.

**I Yoana 1:9**

Nakaneni ani kilimok ngoni Akuj ngasecesia yok, iricuni ngesi akicikakinet keng sodi tosub na iyookino, kirimakini ngesi ngoni

ngasecesia sodi kitoseg ngoni anakiro anakicwanganakini kadaang.

**Matayo 3:11**

Kebatisae ayong esi a ngakipi, itodiunit akibatiso ngina atamar ilunga esi ngasecesia kus. Nakaneni ngolo ebuni ekisidi kang, epolot noi kedwangit ayong. Nyitemokino ayong tani aliwor ekedalan keng atokod ngamuk keng. Kibatisae ngesi a Etao ka akim.

**Ngiepesoi 1:4**

Kolong eringa ngakwapin nyesubuna, kiseuni Akuj ngoni apena tooma Kirisito, atoliworos ngikeng, ngitunga luasegak lu emam akisec alongaren keng.

**Luka 11:13**

Tani iyenete esi luaronok ainakin ngide kus ibore niajokon, nyepedori Apa kus lo eyei nadis ainakin Etau keng ngulu ilipasi a?

**Ngiticisio 1:8a**

Nakaneni na ebunio Etau a Akuj nikus kilelebun esi apolou, iliworosi ngikanyunak kang.

**Ngirumi 8:9**

Nakaneni nyiboyete esi isubete na ecamito ngawat kus esi isubete, ani keyei Etau ngolo a iteni nikus iboyete esi isubete nakilimokinit Etau a Akuj. Ani

keyei itwaan nikus ni emam Etau a Kirisito, meere ngesi ikeng.

**Esekiel 36:27**

Ewaakini Etau kang tooma kus, kesitor lorotin kang, kiwapa eriras kang, tosuba.

**Ngiticisio 4:31**

Naarumoreta kesi akilip, tamaranik ni elipitotor kesi, kilelebun kesi daang Etau a Akuj, tolomakis akitatam ngakiro a Akuj a atitinyu.

**Ngiticisio 13:52**

Alakara noi ngikanupak lu aya Antokia eleleba Etau a Akuj.

**Ngieosio 34:18**

Eapikinit Ekapolon ngulu eriangakina kotere akisec kec anikeng, nabo eyuuni ngulu ipasakina ngitai.

**Isaya 66:2**

Ebala Ekapolon, Kainyo akan kang kolong asubi ngiboro lu daang, sodi topedoreta daang atakanun Nakaneni itwaan en ngesi engolikini ayong, ngini palag, ngini elilimiyorit etau, ngini emarani napei iiraria akiroit kang.

**Akitodikinet 21:4**

Emiatari ngesi ngakiyo daang anakonyen kec. Engopi akitu jik.

Engopi apipilu ka akigoro ta ariaba. Angopia eboyor lokolong ngorot.

**Ngieosio 37:3**

Tonupa Ekapolon tosuba naajokak, sodi kiboikinos lore, kitan iteni dir.

**I Petero 4:12, 13**

Ngipalon kang luminan, warasi nyikitalasi ngakiro nakaapilak kiriebeta esi, tosub kori eyakasi ngakiro ngace naparing esubasi anikus. Nakaneni ejoikinit ilakarosi ani kiboliare esi dang kona aboliare Kirisito sodi talakarotor esi noi na itodiunere asegaanut keng.

## Ngakicikakinet ka ngulu eya nakiningito

Ngieburaniae 2:18

Epedori tokona ngesi akinga-  
rakin lu iningitoe kainyo en-  
ingitoe ngesi dang elope torieb.

Ngirumi 16:20

Ani Akuj na erai nikeng itorunit  
ekisil, nyemamakini akinyasun  
ekipe toreut esi.

Ngieosio 34:19

Elalak ngakiningito a itwaan a  
ni eteneno, nakaneni eyuununi  
Ekapolon ngesi ka nguna ka  
daang.

Isaya 43:2

Ani kitor nakipi nakaalak,  
kiruki ayong ka iyong, ani  
anangololin nyikinyamete nga-

kalel; ani kilot anakim, nyikinomi;  
kori nyikinomi ekatwenyit a akim.

Ngirumi 8:28

Kiyeni ngoni atamar anakiro  
kadaang esubi Akuj naajokak ani  
eya ngulu eminasi ngesi, lu  
anyara ngesi kotere ecami keng.

I Ngikorinitoi 10:13

Akingo daang na ebuni nikus  
ikwaan ka napalem etingene  
ngitunga luce. Nakaneni erai  
Akuj na iteni, nyikiisikini ngesi  
esi kining noi kidwang agogong  
kus na ipiyoreta. Nakaneni esaa lo  
kiningere esi, kiinakini ngesi esi  
agogong na inaikineta sodi ki-  
todik erot lo ibucarotor.

**Akitodikinet 3:12**

Ngulu ipiunete, etiliwori ayong kesi ngapiria na erubito alokai a Akuj kang, nakaneni nyepudunete nabo kaneni jik. Egirakini nabo ayong kidiana keng ekiro a Akuj kang ka ekiro a ere a Akuj kang, Yerusalem lokitetet lo etiyaun anadis ebunit Anakuj. Egirakini ayong tani nikeng ekiro kang lokitetet.

**Akitodikinet 3:5**

Ngulu ipiunete itanapio ngiworui luakwaak loger lo, nakaneni nyekisari ayong ngirora kec anakitab a ngitunga alu eyarete. Alimuni ayong alongaren Apakang ka ngimalaikae keng ileere atamar eraakasi kesi ngikang.

**Akitodikinet 3:21**

Ani ngulu ipiunete, acamuni ayong kesi kiboikinos diyete kang anapolou kang, loger lo kolong epionio ayong ngesi kiboyo tokona ka Apa kang anapolou keng.

**Akitodikinet 21:7**

Itwaan daang ni epiu, eanyuni nu, aliwor ayong Akuj keng, dio toliwor ngesi Lokookang.

**Akitodikinet 2:7**

Ani keya iyong ngaki nakiiraret, kiira robo ngakiro na elimokinit Etau a Akuj ngitunga a ngikanisae. Ani ngulu ipiunete naaronok, acamakini ayong enyami ageor a ekitoe alo akiyar alo erupunit alomana a Akuj.

I Ngikorinitoi 7:10, 11

Kotere ngitunga lu iutarito, alimunit ayong nu a agogong, meere ayong alimunit, erai Ekapolon; nyeisik aberu ekile keng jik. Ani kenger ngesi ekile, ecamit ngesi iboikin nyecam nabo ecekile, ani kemam tobongu nabo lokile keng. Nabo ekile ecamit nyelak aberu keng.

Luka 16:18

Itwaan daang ni elaki aberu keng, sodi kiuut aberu ace, aliwor ekaloman asecaki aberu keng. Asecaki ngesi aberu ngina.

Ngirumi 7:2, 3

Erai tokona kilimuni ekitetemes anaberu ana iusitae, ecamakinitae

alotal ngesi irukete ka ekile keng ngirwa daang lu eyaria ekile, nakaneni ani ketoana ekile keng, nyeriga nabo aberu ngina iwapit ngakiro a etal kangolo. Ani kecamu aberu ngina ecekile eringa lokile keng eyari, aliwor ngesi akaloman. Nakaneni ani ketoana lokile keng, ecamakinitae alotal ekile loce iusi ngesi. Kiuut ngesi ekile loce, meere ngesi akaloman.

Nakaneni kalimokinit tokona atamar, ani kelak itwaan aberu keng, peelomit aberu, asec ngesi ani etiliworia aberu ngina akaloman arai kiuut ecekile. Ekile loce iusi aberu ngina dang aliwor ekaloman. —Matayo 5:32



**Yoana 14:3**

Ani kalot ayong, asubakini ni ilomete esi, abonguni nabo katoriko esi ni amini ayong, sodi ni ayei ayong, pena esi dang.

**Akitodikinet 3:21**

Abunit ayong atipei. Tocoik ibore ni itingit iyong, sodi nyikidema iyong itwaan ebacic lo ipiunio iyong naaronok.

**Matayo 24:27**

Kainyo ikoni abunere a Lokookeng a Itwaan eger lo imiliaunia napei alokide tanang too.

**Mariko 8:38**

Itwaan ni itimi alimor ayong ka ngakiro kang alorwa aluaronok engeritotor ngitunga a Akuj kalu,

itimi tani Lokookeng a Itwaan alimor ngesi ngirwa lu ebunio Lokookeng a Itwaan a Apolou anaketimon ka Apa keng erukito ka ngimalaikae lubekon.

**Matayo 24:30**

Nakaneni etakanuni akitodiu-net a Lokookeng a Itwaan anadis. Ikalounete ngibukui dang anakwapin naingolikineta Lokookeng a Itwaan etiyaun eyei lodowon a adis, etiyaun ngesi a agogong ka asegaanut naapolon noi.

**Yakobo 5:8**

Ejoikinit esi dang ititinyikinetete. Torubakisi igenosi lokojokon, kainyo aapuu akolongit na ebongunio Ekapolon Yesu.

Sodi tamasi, Ngitunga a Galilaya, nyo iwaatar esi kaneni ikieniyaritotor kidiama? Yesu lo ayaar nadis anikus lo, ebonguni loger lopei ianyungareta esi ngesi elosi nadis. —Ngiticisio 1:11

Kainyo dikino Lokookeng a Itwaan ebuni a Apolou anaketimon ka Apa keng erukito ka ngimalaikae keng. Sodi tatak itwaan daang itemem ka etic keng.

—Matayo 16:27

Topupok! Abuni ayong loger a ekokolan. Elakar noi itwaan ni ekienyi iricakinit ngiworui keng, nyerotok ngesi emuner taanyu ngileec alokiding ngitunga.

—Akitodikinet 16:15

Tani esi dang, kiboikinos iricuna kainyo ebuni Lokookeng a Itwaan esaa lo nyitamitotor esi atamar ebuni ngesi. —Luka 12:40

Ngipalon kang luminan, kirai tokona ngoni ngide a Akuj, nakaneni eringa tokona nyileereuno dir atamar kiliwor ngoni nyo. Nakaneni kiyeni ngoni atamar naetakanunia Kirisito, kikwaanikin ngoni ka ngesi kainyo kianyunga ngoni dir eger lo ikoni ngesi. —I Yoana 3:2

Sodi ebuni Lokookeng a Itwaan etakanuni kingolikinae ngesi alotooma ngidowon ka agogong nakaalan ta akwangis naasegan.

—Luka 21:27

## Akiroit a Akuj

Luka 21:33

Edaun adis ka ngakwapin nakaneni nyedaun ngakiro kang jik.

Matayo 22:29

Totacak Yesu kesi tama, Icwangakinito esi ani nyiyeneta ngagiran kori agogong a Akuj.

Ngieosio 119:11

Eweit ayong akiroit kon alotau kang, sodi nyakasecakinia iyong.

II Petero 1:21

Kainyo emam nakanuan ngakiro a Akuj adwar itwaan loger

lo ecamit ngesi ilope. Nakaneni eruorosi ngitunga ngakiro a Akuj loger lo etodikinitor Etau a Akuj.

Ngieosio 119:105

Erai akiroit kon akinuaket a ngamejen kang ka akica a erot kang.

II Timoteo 3:16

Eponito ngagiran daang ani a Akuj nabo itemokino itatamere, itodenakinere ngitunga ngasecesia kec ka akirik ta akitatam nguna eteneeko.

Published in numerous languages as God supplies funds in answer to prayer. If you would like more copies for prayerful distribution, write in English. Specify which language(s) you need and how many booklets.

**World Missionary Press, PO Box 120, New Paris, IN 46553-0120 USA**



Read booklets online or by App  
[www.wmp-readonline.org](http://www.wmp-readonline.org)